

Masharti ya Agano

Sasa basi, ikiwa mtaitii sauti yangu kweli kweli, na kulishika agano langu, hapo ndipo mtakapokuwa tunu kwangu kuliko makabila yote ya watu.

Kutoka 19:5.

Hapo mwanzo, Mungu alitoa sheria Yake kwa wanadamu kama njia ya kupata furaha na uzima wa milele.

Amri kumi, Uta... na Usi..., ni ahadi kumi, tulizohakikishiwa kama tutatii sheria inayouongoza ulimwengu. “Mkinipenda, mtazishika amri zangu” (Yohana 14:15). Hii ndiyo jumla na kiini cha sheria ya Mungu. Masharti ya wokovu kwa kila mwana na binti wa Adamu yameelezwa hapa.

...

Sheria hiyo ya kanuni kumi za upendo mkuu ambao unaweza kuwasilishwa kwa mwanadamu ni sauti ya Mungu kutoka mbinguni ikizungumza na roho katika ahadi, “Fanya hivi nawe hutakuwa chini ya mamlaka na udhibiti wa Shetani.” Hakuna neno hasi katika sheria hiyo, ingawa inaweza kuonekana hivyo. Ni Tenda na Uishi.

Sharti la uzima wa milele sasa liko vile vile ambavyo limekuwepo siku zote—vile vile lilivyokuwa katika Paradiso kabla ya anguko la wazazi wetu wa kwanza—utii mkamilifu kwa sheria ya Mungu, haki kamilifu. Ikiwa uzima wa milele ungetolewa kwa sharti lolote pungufu ya hili, basi furaha ya ulimwengu wote ingehatarishwa. Njia ingefunguliwa kwa ajili ya dhambi, pamoja na msururu wake wote wa huzuni na mateso, kufanywa kutoweza kufa.

Kristo hapunguzi madai ya sheria. Katika lugha dhahiri anawasilisha utii Kwake kama sharti la uzima wa milele—sharti lile lile ambalo lilihitajika kwa Adamu kabla ya kuanguka kwake. ... Sharti chini ya agano la neema ni pana vile vile kama sharti lililowekwa katika Edeni—upatanifu na sheria ya Mungu, ambayo ni takatifu ya haki na njema.

Kiwango cha tabia kilichowasilishwa katika Agano la Kale ni sawa na kile kinachowasilishwa katika Agano Jipya. Kiwango hiki si kile ambacho hatuwezi kukifikia. Katika kila amri au agizo ambalo Mungu anatoa kuna ahadi, iliyo chanya zaidi, iliyo msingi wa amri hiyo. Mungu ametoa majaliwa ili tuweze kuwa kama Yeye na atalitimiza hili kwa wote ambao hawaweki kizuizi cha nia potovu na hivyo kuzuia neema Yake.